



## “SALAH FAHAM TERHADAP ISLAM”

الْحَمْدُ لِلَّهِ الْقَائِلِ: وَمِنَ النَّاسِ مَنْ يُعْجِبُكَ قَوْلُهُ فِي  
الْحَيَاةِ الدُّنْيَا وَيُشْهَدُ اللَّهُ عَلَى مَا فِي قَلْبِهِ وَهُوَ أَلَدُّ  
الْخِصَامِ ﴿٢٠٤﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،  
وَأَشْهَدُ أَنَّ مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ  
وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ!، اتَّقُوا اللَّهَ، أَوْصِيكُمْ  
وَأَيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:  
يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا  
وَأَنْتُمْ مُسْلِمُونَ.



### **Sidang Jumaat yang dirahmati Allah,**

Saya berpesan kepada diri saya dan menyeru kepada sidang Jumaat yang dikasihi sekalian, marilah kita bertakwa kepada Allah SWT. dengan melaksanakan semua perintah-Nya dan menjauhi segala larangan-Nya. Sesungguhnya orang yang paling mulia di sisi Allah SWT. ialah orang yang paling bertakwa. Kerana takwa merupakan penentu martabat kita di sisi Allah SWT. Istiqamahlah dalam mengamalkan segala perintah Allah SWT dan ajaran Rasulullah s.a.w. Dengan mentaati Allah dan Rasul-Nya, insya-Allah kita akan disayangi dan dijauhkan dari mala-petaka serta beroleh kejayaan sama ada di dunia mahu pun di akhirat nanti.

### **Sidang Jumaat yang dirahmati Allah,**

Marilah kita menghayati hadith daripada Abu Hurairah r.a., bahawa Rasulullah s.a.w. bersabda yang bermaksud:

"Islam mula tersebar dalam keadaan dagang ( asing ) dan ia akan kembali dagang ( asing ) pula, maka beruntunlah orang-orang yang asing".

**(Riwayat Muslim).**

Hadith ini jelas menyatakan bahawa Islam yang bermula dengan dagang ( asing ) akan menjadi dagang di akhir zaman nanti. Sejarah telah menukilkan bahawa perkembangan Islam di peringkat awal juga asing. Islam sentiasa menghadapi kesukaran dan mendapat tentangan yang berpanjangan. Berkat ketabahan, kekentalan, kegigihan dan keyakinan para pendakwah atau da'ie serta dengan izin Allah Islam telah berkembang sehingga menjadi kuasa



dunia yang hebat pada era kegemilangannya. Islam telah berjaya melahirkan insan yang berperibadi mulia, mempunyai jati diri unggul dan berwibawa. Ketika itu wujud keadilan, kejujuran, ketelusan, ketenteraman, keharmonian, kedamaian dan ketenangan. Namun selaku manusia mereka juga menghadapi pelbagai ujian, godaan nafsu dan kelemahan diri di samping serangan fitnah, khianat dan dengki sesama sendiri sehingga umat Islam jatuh, tamadun Islam runtuh sehinggalah sekarang.

Namun Allah SWT tetap melahirkan sekelompok insan mulia yang sentiasa istiqamah untuk membangun ummah berdasarkan syariatnya. Golongan ini sentiasa gigih menyebarkan Islam supaya menjadi ikutan dan amalan manusia untuk mencapai kejayaan yang diredhai Allah SWT. Pada masa yang sama wujud pula segolongan manusia yang menghadapi krisis nilai terhadap agama. Golongan ini bertanya; "Adakah agama merupakan satu keperluan? atau agama hanya satu kecenderungan peribadi. Adakah ini bermaksud siapa suka boleh beragama dan siapa tidak suka boleh jadi atheis atau ikut mana-mana agama kerana semuanya sama, dan ada banyak jalan ke syurga!.

Dalam situasi krisis nilai inilah golongan yang ingin mengembalikan Islam ke Persada Keagungannya menghadapi segelintir umat Islam yang meragui, mempertikai, meremeh dan buruk sangka terhadap orang Islam. Pada masa yang sama mereka juga menghadapi orang kafir yang benci kepada Islam.



## **Sidang Jumaat yang dirahmati Allah,**

Justeru, setiap individu yang ingin mempertahankan dan setia dengan Islam pasti akan mengharungi ujian, rintangan, halangan, cemuhan, ejekan, cacian, makian dari mereka yang memang tidak redha dengan Islam. Manakala orang yang beramal secara sambil-lewa terhadap Islam akan mendapat sanjungan atau kurang menghadapi tekanan. Persoalannya apakah mereka yang tidak yakin dan malahan benci terhadap Islam ini tanpa disedari rupa-rupanya telah bersekongkol dengan Yahudi, Nasrani dan Puak Kafir lain sebagaimana Firman Allah SWT dalam Al-Quran surah Al-Baqarah ayat 120;

وَلَنْ تَرْضَىٰ عَنْكَ الْيَهُودُ وَلَا النَّصَارَىٰ حَتَّىٰ تَتَّبِعَ مِلَّتَهُمْ

"Orang Yahudi dan Nasrani tidak sekali-kali akan bersetuju atau suka kepada Engkau (wahai Muhammad) sehingga Engkau menurut millah ( agama ) mereka ( yang telah terpesong itu )".

Oleh yang demikian, marilah kita tanpa mengira pegangan parti politik dan kedudukan, supaya benar-benar menghayati maksud ayat tadi yang jelas menyatakan bahawa orang kafir secara umumnya, Yahudi dan Nasrani khususnya tidak akan redha jika Islam kembali mengungguli kepimpinan ummah. Mereka akan mengadakan pelbagai alasan dan melemparkan pelbagai tuduhan terhadap Islam supaya ianya diragui serta seterusnya dijaui. Mereka turut mengatakan; "Apakah agama yang membenarkan perbezaan taraf antara lelaki dan wanita, mengenakan hukum rejam, kerat tangan dan sebat masih relevan dengan zaman ini?".



## **Sidang Jumaat yang dirahmati Allah,**

Begitulah Islam akan sentiasa dibenci. Inilah sunnah Islam. Tidak hairanlah jika golongan yang tidak meredhai Islam ini sentiasa menganjur serta melaksanakan pelbagai aktiviti yang boleh melalai, melekakan dan merosakkan iman serta akidah umat Islam. Mereka akan melakukan apa sahaja gangguan, sekatan, tuduhan, ancaman dan kekacauan semata-mata untuk memastikan supaya ada di kalangan umat Islam yang keliru, terpesong, menyeleweng, ragu-ragu dan tidak yakin dengan keupayaan Islam dalam menyelesaikan kemelut kehidupan umat manusia.

Hasil usaha yang gigih musuh-musuh Islam ini mereka telah berjaya menarik sebahagian penganut Islam untuk meninggalkan Islam. Mereka menganggap Islam tiada kaitan langsung dalam mengendalikan urusan dunia. Lebih menyedihkan lagi ialah penganut Islam yang berjaya dipesong dan dikelirukan ini kelihatan taat dalam melaksanakan ibadah; seperti solat, puasa, haji dan zakat. Ada ketikanya mereka memetik ayat Al-Quran dan hadith Rasulullah s.a.w. apabila berhujjah, tetapi meninggalkan syariat Islam ketika mengendalikan urusan politik, ekonomi, sosial dan sebagainya.

Bukankah sebahagian besar umat Islam telah mempelajari Islam sejak kecil; dari Tadika, Sekolah Rendah, Menengah dan Pusat Pengajian Tinggi. Sama ada di masjid, surau dan di tempat-tempat turut mengadakan Kuliah-kuliah Agama. Para Pendakwah sentiasa memberi ingatan. Ibu bapa juga telah memberi teguran. Anggota masyarakat turut memainkan peranan. Sedangkan kecelaruan masih berterusan. Inilah isu yang patut difikir dan perlu diselesaikan.



## **Sidang Jumaat yang dirahmati Allah,**

Mereka yang keliru ini menganggap agama semata-mata sebagai urusan peribadatan. Sebab itulah agama mesti dipisahkan daripada amalan dunia. Mereka inilah golongan yang mengatakan judi dan arak dibolehkan apabila dilesenkan atau rasuah memang haram, tetapi kalau orang memberi dengan tidak diminta, ambil sahajalah. Seterusnya segala pesta, keramaian dan kegiatan tetap diteruskan walaupun ia mengandungi unsur yang bertentangan dengan syarak. Segala adat terus dilaksana walaupun berunsur khurafat dan amalan memuja sehingga menyelewengkan akidah.

Mengapa keadaan ini masih wujud?. Apakah segala Sistem Pembelajaran, maklumat dan penyampaian selama ini tidak berkesan, tersilap atau tidak mencapai sasarannya?. Atau Islam hanya disampaikan secara sambil-lewa tanpa menekankan bahawa ia adalah satu cara hidup yang sempurna!. Mengapa masih terdapat di kalangan umat Islam yang kuat berpegang serta yakin kepada panduan ciptaan manusia berbanding panduan yang diturunkan oleh Allah SWT dan telah disampaikan oleh Rasulullah s.a.w.?. Sedangkan pada masa yang sama mereka mengakui kesempurnaan ajaran Allah SWT. Ini yang dikatakan salah faham terhadap Islam, keliru, terpesong, sekular atau sesat. Wal'iyazu billahi.

Salah faham terhadap Islam ini wujud kerana pada masa yang sama segala kebaikan berlaku, pelbagai keburukan juga terjadi. Kebaikan dan kejahatan tadi dilakukan oleh orang yang sama, penganjur yang sama dan penguasa yang sama. Pada satu waktu mereka adakan Majlis Tahlil, Bacaan Yasin dan Doa Selamat, tetapi selepas itu mereka juga yang menganjurkan Majlis Maksiat yang mendedahkan aurat atau seseorang pada suatu ketika melakukan kebaikan tetapi pada ketika lain berada di tempat yang ada unsur-unsur kemungkaran.



## **Sidang Jumaat yang dirahmati Allah,**

Lebih menyedihkan lagi bila seseorang pada satu-satu waktu amat bercakap tentang kebaikan dan kesempurnaan peraturan Islam tetapi pada masa yang sama ia juga sedang mengingkari peraturan Allah. Mereka mampu menyatakan bahawa syariat Islam itu baik dan sempurna, tetapi pada masa yang sama ia menyatakan riba itu harus kerana masalah 'aammah. Mereka berhujjah kalau tak terlibat dengan riba bagaimana nak dapat pinjaman, nak dapat modal dan meneruskan kegiatan, ini sangat mengelirukan.

Di samping itu tidak kurang juga ada di antara umat Islam yang sanggup menyatakan;

"Tak apalah kita melakukan sedikit dosa atau sekali-sekala melanggar syariat dengan sengaja kerana Allah memahami kita. Ada juga yang mengungkit selama ini telah banyak kebaikan yang telah mereka lakukan, maka bolehlah sesekali dilanggar perintah Allah, lepas itu mohonlah ampun dan bertaubat, kerana Allah Maha pengampun. Astaghfirullah, dengan sengaja dan sedar masih ada segelintir umat Islam yang berfikiran sedemikian. sedangkan Islam perlu dihayati, diamal dan dianuti secara menyeluruh meliputi zahir dan batin. Selagi masih ada segelintir umat Islam yang keliru, memisahkan agama dengan urusan kehidupan dan menyanjung tinggi segala pemikiran yang salah, tidak kira datang dari barat, timur atau mana-mana sahaja maka selama itulah umat Islam akan berterusan berhadapan dengan situasi sebegini.



Maka segala salah faham, kekeliruan, kekaburan, ketidak jelasan tentang penghayatan syariat Islam yang syumul ini perlu diperbetul dan diperangi habis-habisan. Setiap insan muslim yang mencintai kebenaran dan mahu melihat Syariat Islam terlaksana mesti sanggup melakukan jihad yang berterusan ke arah memberikan teguran, nasihat dan pandangan dengan penuh hikmah dan bijaksana. Contohilah kehebatan peribadi Rasulullah s.a.w. serta para sahabat Baginda dalam mengamal dan mempertahankan segala syariat Allah SWT.

### **Sidang Jumaat yang dirahmati Allah,**

Oleh itu, marilah kita kembali menghayati, melaksana dan mengamalkan segala Tuntutan Islam sebenar berpandukan kepada Quran dan Sunnah. Insya-Allah, kita akan selamat dan sentiasa dibimbing oleh Allah SWT ke jalan yang diredhai-Nya.

أَعُوذُ بِاللَّهِ مِنَ الشَّيْطَانِ الرَّجِيمِ  
وَمَنْ يُطِيعِ اللَّهَ وَالرَّسُولَ فَأُولَئِكَ مَعَ الَّذِينَ أَنْعَمَ اللَّهُ عَلَيْهِمْ  
مِنَ النَّبِيِّينَ وَالصِّدِّيقِينَ وَالشُّهَدَاءِ وَالصَّالِحِينَ وَحَسُنَ  
أُولَئِكَ رَفِيقًا ﴿٦٩﴾ ذَلِكَ الْفَضْلُ مِنَ اللَّهِ وَكَفَى بِاللَّهِ  
عَلِيمًا ﴿٧٠﴾

(النساء : 69-70).





"Sesiapa yang mentaati Allah dan Rasul-Nya, maka mereka akan (di tempatkan di syurga) bersama-sama orang yang telah dikurniakan nikmat oleh Allah kepada mereka, iaitu Nabi-nabi, Para Siddiqin, Para Syuhada' (orang yang mati syahid) dan orang yang soleh; serta mereka itulah teman yang sebaik-baiknya". "Yang demikian itu adalah kurniaan daripada Allah. Cukuplah Allah yang Maha Mengetahui (akan balasan pahala-Nya)".

بَارَكَ اللَّهُ لِيْ وَلَكُمْ بِالْقُرْآنِ الْعَظِيمِ، وَنَفَعَنِيْ وَإِيَّاكُمْ بِمَا  
فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّيْ وَمِنْكُمْ  
تِلَاوَتَهُ، إِنَّهُ هُوَ السَّمِيعُ الْعَلِيمُ.

أَقُولُ قَوْلِيْ هَذَا وَأَسْتَغْفِرُ اللَّهَ الْعَظِيمَ لِيْ وَلَكُمْ  
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ  
وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ، لَا شَرِيكَ لَهُ،  
وَأَشْهَدُ أَنَّ مُحَمَّدًا عَبْدُهُ، وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى  
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ فَقَدْ فَازَ الْمُتَّقُونَ.  
قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ  
يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ وَسَلِّمْ عَلَى سَيِّدِ الْمُرْسَلِينَ وَارْضَ اللَّهُمَّ عَنْ  
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ  
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ



الدَّعَوَاتِ وَيَا قَاضِيَ الْحَاجَاتِ. اَللّٰهُمَّ اِنَّا نَسْأَلُكَ وَنَتَوَسَّلُ  
إِلَيْكَ بِنَبِيِّكَ الْأَمِينِ، وَنَسْأَلُكَ بِأَسْمَائِكَ الْحُسْنَىٰ وَصِفَاتِكَ  
الْعُظْمَىٰ أَنْ تَحْفَظَ بَعَيْنَ عِنَايَتِكَ الرَّبَّانِيَّةَ وَبِحِفْظِ وَقَايَتِكَ  
الصِّمْدَانِيَّةَ، جَلَالَةَ مَلِكِنَا الْمُعَظَّمِ سُلْطَانَ سَلَاعُورَ، سُلْطَانَ  
شَرَفُ الدِّينِ ادریس شاه الحاج ابن المرحوم سُلْطَانَ  
صَلَّاحُ الدِّينِ عبد العزيز شاه الحاج.

اَللّٰهُمَّ اَدِمِ الْعَوْنَ وَالْهَدَايَةَ وَالتَّوْفِيقَ، وَالصِّحَّةَ وَالسَّلَامَةَ  
مِنْكَ، لَوْلِيَّ عَهْدِ سَلَاعُورَ، تَعَكُّوْ اَمِيرِ شَاهِ ابْنِ السُّلْطَانَ  
شَرَفُ الدِّينِ ادریس شاه الحاج فِيْ اَمْنٍ وَصَلَّاحُ وَعَافِيَةٍ  
بِمَنْكَ وَكَرَمِكَ يَا ذَا الْجَلَالِ وَالْاِكْرَامِ. اَللّٰهُمَّ اَطْلُ  
عُمَرَهُمَا مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ  
مَقَاصِدَهُمَا لِطَرِيقِ الْهُدَىٰ وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan.



Justeru kami pohon kehadiran-Mu Ya Allah, tetapkanlah iman kami, tingkatkanlah amal kami, kukuhkanlah perpaduan kami, murahkanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada ujian-Mu yang berat seperti kemarau panjang, banjir besar, wabak penyakit, persengketaan, kemiskinan dan lain-lain, supaya dengan demikian, negeri kami akan sentiasa bertambah makmur dan berkat.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ وَاجْعَلْنَا  
لِلْمُتَّقِينَ إِمَامًا. رَبَّنَا آتِنَا فِي الدُّنْيَا حَسَنَةً وَفِي الْآخِرَةِ  
حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يَعْظُمُ لِعَلَّكُمْ تَذَكَّرُونَ ﴿٩﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعَمِهِ  
يَزِدْكُمْ، وَاسْأَلُوهُ مِنْ فَضْلِهِ ۚ يُعْطِيكُمْ وَلَذِكْرُ اللَّهِ أَكْبَرُ  
وَاللَّهُ يَعْلَمُ مَا تَصْنَعُونَ.